



荀子第十七卷

性惡篇第二十三

人之性惡其善者僞也今人之性生而有好利焉順
是故爭奪生而辭讓亡焉生而有疾惡焉順是故殘
賊生而忠信亡焉生而有耳目之欲有好聲色焉順
是故淫亂生而禮義文理亡焉然則從人之性順人
之情必出於爭奪合於犯分亂理而歸於暴故必將
有師法之化禮義之道然後出於辭讓合於文理而
歸於治用此觀之然則人之性惡明矣其善者僞也
故枸木必將待隱括烝矯然後直鈍金必將待礪厲

然後利今人之性惡必將待師法然後正得禮義然後治今人無師法則偏險而不正無禮義則悖亂而不治古者聖人以人之性惡以爲偏險而不正悖亂而不治是以爲之起禮義制法度以矯飾人之情性而正之以擾化人之情性而道之也使皆出於理合於道者也今人化師法積文學道禮義者爲君子從性情安恣睢慢禮義者爲小人用此觀之然則人之性惡明矣其善者僞也孟子曰人之學學者其性善也曰是不然是不及知人之性而不察乎僞之情者也凡性者天之就也不可學不可事禮義者聖人之所生也人之所學而能所事而成者也不可學不可事而在人者謂之性可學而能可事而成在人者謂之僞是性僞之分也今人之性目可以見耳可以聽夫可以見之明不離目可以聽之聰不離耳目明而耳聰不可學明矣孟子曰今之人性善將皆失喪其性故也曰若是則過矣今人之性生而離其朴離其資必失而喪用此觀之然則人之性惡明矣所謂性善者不離其朴而美之不離其資而利之也使夫資朴之於美心意之於善若夫可以見之明不離目可以聽之聰不離耳故曰目明而耳聰也今人之性饑

而欲飽寒而欲煖勞而欲休此人之情性也今人饑
見長而不敢先食者將有所讓也勞而不敢求息者
將有所代也夫子之讓乎父弟之讓乎兄子之代父
弟之代兄此二行者皆反於性而悖於情也然而孝
子之道禮義之文理也故順情性則不辭讓矣辭讓
則悖於情性矣用此觀之然則人之性惡明矣其善
者僞也問者曰人之性惡則禮義惡生應之曰凡禮
義者是生於聖人之僞非故生於人之性也故陶人
埴埴而爲器然則器生於工人之僞非故生於人之
性也故工人斲木而成器然則器生於工人之僞非

故生於人之性也聖人積思慮習僞故以生禮義而
起法度然則禮義法度者是生聖人之僞非故生於
人之性也若夫目好色耳好聲口好味心好利骨體
膚理好愉佚是皆生於人之情性也感而自然不待
事而後生之者也夫感而不能然必且待事而後然
謂人之生於僞是性僞之所生其不同之徵也故聖
人化性而起僞僞起而生禮義禮義生而制法度然
則禮義法度者是聖人之所生也故聖人之所以同
於衆其不異於衆者性也所以異而制衆者僞也夫
好利而欲得者此人之情性也假之有弟兄資財而

分者且順情性好利而欲得若是則兄弟相拂奪矣
且化禮義之文理若是則讓乎國人矣故順情性則
弟兄爭矣化禮義則讓國人矣凡人之欲爲善者爲
性惡也夫薄願厚惡願美狹願廣貧願富賤願貴苟
無之中者必求於外故富而不願財貴而不願勢苟
有之中者不及於外用此觀之人之欲爲善者爲性
惡也今人之性固無禮義故彊學而求有之也性不
知禮義故思慮而求知之也然則性而已則人無禮
義不知禮義人無禮義則亂不知禮義則悖然則性
而已則悖亂在已用此觀之人之性惡明矣其善者
僞也孟子曰人之性善曰是不然凡古今天下之所
謂善者正理平治也所謂惡者偏險悖亂也是善惡
之分也已今誠以人之性固正理平治邪則有惡用
聖王惡用禮義矣哉雖有聖王禮義將曷加於正理
平治也哉今不然人之性惡故古者聖人以人之性
惡以爲偏險而不正悖亂而不治故爲之立君上之
勢以臨之明禮義以化之起法正以治之重刑罰以
禁之使天下皆出於治合於善也是聖王之治而禮
義之化也今當試去君上之勢無禮義之化去法正
之治無刑罰之禁倚而觀天下民之相與也若是則

夫彊者害弱而奪之衆者暴寡而譁之天下之悖亂而相亡不待頃矣用此觀之然則人之性惡明矣其善者僞也故善言古者必有節於今善言天者必有徵於人凡論者貴其有辨合其符驗故坐而言之起而可設張而可施行今孟子曰人之性善無辨不合符驗坐而言之起而不可設張而不可施行豈不過甚矣哉故性善則去聖王息禮義矣性惡則興聖王貴禮義矣故隱括之生爲杓木也繩墨之起爲不直也立君上明禮義爲性惡也用此觀之然則人之性惡明矣其善者僞也直木不待隱括而直者其性直也杓木必將待隱括丞矯然後直者以其性不直也今人之性惡必將待聖王之治禮義之化然後皆出於治合於善也用此觀之然則人之性惡明矣其善者僞也問者曰禮義積僞者是人之性故聖人能生之也應之曰是不然夫陶人埏埴而生瓦然則瓦埴豈陶人之性也哉工人斲木而生器然則器木豈工人之性也哉夫聖人之於禮義也辟亦陶埴而生之也然則禮義積僞者豈人之性也哉凡人之性者堯舜之與桀跖也其性一也君子之與小人其性一也今將以禮義積僞人之性邪然則有曷貴堯禹曷貴

君子矣哉凡所貴堯禹君子者能化性能起僞僞起而生禮義然則聖人之於禮義積僞也亦陶埏而生之也用此觀之然則禮義積僞豈人之性也哉所賤於桀跖小人者從其性順其情安恣睢以出乎貪利爭奪故人之性惡明矣其善者僞也天非私曾騫孝已而外衆人也然則曾騫孝已獨厚於孝之實而全於孝之名者何也以綦禮義故也天非私齊魯之民而外秦人也然而於父子之義夫婦之別不如齊魯之孝具敬父者何也以秦人之從情性安恣睢慢於義故也豈其性異矣哉塗之人可以爲禹焉謂也

凡禹之所以爲禹者以其爲仁義法正也然則仁義法正有可知可能之理然而塗之人也皆有可以知仁義法正之質皆有可以能仁義法正之具然則其可以爲禹明矣今以仁義法正爲固無可知可能之理邪然則唯禹不知仁義法正不能仁義法正也將使塗之人固無可以知仁義法正之質而固無可以能仁義法正之具邪然則塗之人也且內不可以知父子之義外不可以知君臣之正不然今塗之人者皆內可以知父子之義外可以知君臣之正然則其可以知之質可以能之具其在塗之人明矣今使

塗之人者以其可以知之質可以能之具本夫仁義可知之理可能之具然則其可以爲禹明矣今使塗之人伏術爲學專心一志思索孰察加日縣久積善而不息則通於神明參於天地矣故聖人者人之所積而致也曰聖可積而致然而皆不可積何也曰可以而不可使也故小人可以爲君子而不肯爲君子君子可以爲小人而不肯爲小人小人君子者未嘗不可以相爲也然而不相爲者可以而不可使也故塗之人可以爲禹未必然也塗之人可以爲禹則然塗之人能爲禹未必然也雖不能爲禹無害可以爲禹足可以徧行天下然而未嘗有能徧行天下者也夫工匠農賈未嘗不可以相爲事也然而未嘗能相爲事也用此觀之然則可以爲未必能也雖不能無害可以爲然則能不能之與可不可其不同遠矣其不可以相爲明矣堯問於舜曰人情何如舜對曰人情甚不美又何問焉妻子具而孝衰於親嗜欲得而信衰於友爵祿盈而忠衰於君人之情乎人之情乎甚不美又何問焉唯賢者爲不然有聖人之知者有士君子之知者有小人之知者有役夫之知者多言則文而類終日議其所以言之千舉萬變其統類一

也是聖人之知也少言則徑而省論而法若佚之以
繩是士君子之知也其言也諛其行也悖其舉事多
悔是小人之知也齊給便敏而無類雜能勞魄而毋
用折速粹熟而不急不恤是非不論曲直以期勝人
爲意是役夫之知也有上勇者有中勇者有下勇者
天下有中敢直其身先王有道敢行其意上不修於
亂世之君下不俗於亂世之民仁之所在無貧窮仁
之所亡無富貴天下知之則欲與天下同苦樂之天
下不知也則傀然獨立天地之間而不畏是上勇也
禮恭而意儉大齊信焉而輕貨財賢者敢推而尚之
不肖者敢援而廢之是中勇也輕身而重貨恬禍而
廣解苟不恤是非然不然之情以期勝人爲意是下
勇也繁弱鉅黍拒一作來古之良弓也然而不得排擻則
不能自正桓公之葱太公之闕文王之錄莊君之宵
闔閭干將莫邪鉅闕辟閭此皆古之良劍也然而不
加砥礪則不能利不得人力則不能斷驩騶騏驥纖
離綠耳此皆古之良馬也然而前必有銜轡之制後
有鞭策之威加之以造父之叙然後一日而致千里
也夫人雖有性質美而心辯知必將求賢師而事之
擇賢友而友之得賢師而事之則所聞者堯舜禹湯

之道也得良友而友之則所見者忠信敬讓之行也
身日進於仁義而不自知也者靡使然也今與不善
人處則所聞者欺誣詐僞也所見者汙漫淫邪貪利
之行也身且加於刑戮而不自知者靡使然也傳曰
不知其子視其友不知其君視其左右靡而已矣

君子篇第二十四

天子無妻告人無匹也四海之內無客禮告無適也
足能行待相者然後進口能言待官人然後詔不視
而見不聽而聰不言而信不慮而知不動而功告至
備也天子也者勢至重形至佚心至愉志無所詘形
無所勞尊無上矣詩曰普天之下莫非王土率土之
濱莫非王臣此之謂也聖王在上分義行乎下則士
大夫無流淫之行百吏官人無怠慢之事衆庶百姓
無姦怪之俗無盜賊之罪莫敢犯大上之禁天下曉
然皆知夫盜竊之人不可以爲富也皆知夫賊害之
人不可以爲壽也皆知夫犯上之禁不可以爲安也
由其道則人得其所好焉不由其道則必遇其所惡
焉是故刑罰綦省而威行如流世曉然皆知夫爲姦
則雖隱竄逃亡之由不足以免也故莫不服罪而請
書曰凡人自得罪此之謂也故刑當罪則威不當罪

則侮爵當賢則貴不當賢則賤古者刑不過罪爵不踰德故殺其父而臣其子殺其兄而臣其弟刑罰不怒罪爵賞不踰德分然各以其誠通是以爲善者勸爲不善者沮刑罰綦省而威行如流政令致明而化易如神傳曰一人有慶兆民賴之此之謂也亂世不然刑罰怒罪爵賞踰德以族論罪以世舉賢故一人有罪而三族皆夷德雖如舜不免刑均是以族論罪也先祖當賢子孫必顯行雖如桀紂列從必尊此以世舉賢也以族論罪以世舉賢雖欲無亂得乎哉詩曰百川沸騰山冢萃崩高岸爲谷深谷爲陵哀今之人胡憖莫懲此之謂也論法聖王則知所貴矣以義制事則知所利矣論知所貴則知所養矣事知所利則動知所出矣二者是非之本得失之源也故成王之於周公也無所往而不聽知所貴也桓公之於管仲也國事無所往而不用知所利也吳有伍子胥而不能用國至于亡倍道失賢也故尊聖者王貴賢者霸敬賢者存慢賢者亡古今一也故尚賢使能等貴賤分親疏序長幼此先王之道也故尚賢使能則上尊下安貴賤有等則令行而不流親疏有分則施行而不悖長幼有序則事業捷成而有所休故仁者仁

此者也義者分此者也節者死生此者也忠者敦慎此者也兼此而能之備矣備而不矜一自善也謂之聖不矜矣夫故天下不與爭能而致善用其功有而不有也夫故爲天下貴矣詩曰淑人君子其儀不忒其儀不忒正是四國此之謂也

荀子第十七卷終

荀子第十八卷

成相篇第二十五

請成相世之殃愚闇愚闇墮賢良人主無賢如瞽無相何佞佞請布基慎聖人愚而自專事不治主忌苟勝羣臣莫諫必逢災論臣過反其施尊主安國尚賢義距諫飾非愚而上同國必禍曷謂罷國多私比周還主黨與施遠賢近讒忠臣蔽塞主勢移曷謂賢明君臣上能尊主愛下民主誠聽之天下爲一海內賓主之孽讒人達賢能遁逃國乃廢愚以重愚闇以重闇成爲桀世之災如賢能飛廉知政任惡來卑其志

意大其園囿高其臺武王怒師牧野紂卒易鄉啓乃
下武王善之封之於宋立其祖世之衰讒人歸比干
見剗箕子累武王誅之呂尚招麾殷民懷世之禍惡
賢士子胥見殺百里徒穆公任之彊配五伯六卿施
世之愚惡大儒逆斥不通孔子拘展禽三絀春申道
綴基畢輸請牧基賢者思堯在萬世如見之讒人罔
極險陂傾側此之疑基必施辨賢罷文武之道同伏
戲由之者治不由者亂何疑爲凡成相辦法方至治
之極復後王慎墨季惠百家之說誠不詳治復一脩
之吉君子執之心如結衆人貳之讒夫奔之形是詰
水至平端不傾心術如此象聖人而有勢直而用拙
必參天世無王窮賢良暴人芻豢仁人糟糠禮樂滅
息聖人隱伏墨術行治之經禮與刑君子以脩百姓
寧明德慎罰國爭旣治四海平治之志後勢富君子
誠之好以待處之敦固有深藏之能遠思思乃精志
之榮好而一之神以成精神相反一而不二爲聖人
治之道美不老君子由之倂以好下以教誨子弟上
以事祖考成相竭辭不麀君子道之順以達宗其賢
良辨其妖孽請成相道聖王堯舜尚賢身辭讓許由
善卷重義輕利行顯明堯讓賢以爲民汜利兼愛德

施均辯治上下貴賤有等明君臣堯授能舜遇時尚
賢推德天下治雖有賢聖適不遇世孰知之堯不能
舜不辭妻以二女任以事大人哉舜南面而立萬物
備舜授禹以天下尚得推賢不失序外不避仇內不
阿親賢者予禹勞心力堯有德干戈不用三苗服舉
舜剛畝任之天下身休息得后稷五穀殖夔為樂正
鳥獸服契為司徒民知孝弟尊有德禹有功抑下鴻
辟除民害逐共工北決九河通十二渚疏三江禹傳
敷土平天下躬親為民行勞苦得益皐陶橫革直成
為輔契玄王生昭明居於砥石遷于商十有四世乃
有天乙是成湯天乙湯論舉當身讓下隋舉牟光道
古賢聖基必張願陳辭世亂惡善不此治隱諱疾賢
良由姦詐鮮無災患難哉反為先聖知不用愚者謀
前車已覆後未知更何覺時不覺悟不知苦迷惑失
指不易上下忠不上達蒙揜耳目塞門戶門戶塞大
迷惑悖亂昏莫不終極是非反易比周欺上惡正直
正直惡心無度邪枉辟回失道途已無尤人我獨自
美豈獨無故不知戒後必有恨後遂過不肯悔讒夫
多進反覆言語生詐態人之態不如備爭寵嫉賢利
惡忌妬功毀賢下歛黨與上蔽匿上壅蔽失輔勢任

用讒夫不能制孰或為郭公長父之難厲王流于彘周

幽厲所以敗不聽規諫忠是害嗟我何人獨不遇時

當亂世欲衷對言不從恐為子胥身離凶進諫不聽

到以獨鹿奔之江觀往事以自戒治亂是非亦可識

託於成相以喻意請成相言治方君論有五約以明

君謹守之下皆平正國乃昌臣下職莫游食務本節

用財無極事業聽上莫得相使一民力守其職足衣

食厚薄有等明爵服利往印上莫得擅與孰私得君

法明論有常表儀既設民知方進退有律莫得貴賤

孰私王君法儀禁不為莫不說教名不移脩之者榮

離之者辱孰他師刑稱陳守其垠下不得用輕私門

罪禍有律莫得輕重威不分請牧祺明有基主好論

議必善謀五聽脩領莫不理續主執持聽之經明其

請參伍明謹施賞刑顯者必得隱者復顯民反誠言

有節稽其實信誕以分賞罰必下不欺上皆以情言

明若日上通利隱遠至觀法不法見不視耳目既顯

吏敬法令莫敢恣君教出行有律吏謹將之無鉞披

滑汨下不私請各以宜舍巧拙臣謹脩君制變公察

善思論不亂以治天下後世法之成律貫

賦篇第二十六

爰有大物非絲非帛文理成章非日非月爲天下明
生者以壽死者以葬城郭以固三軍以彊粹而王駁
而伯無一焉而亡臣愚不識敢請之王王曰此夫文
而不采者與簡然易知而致有理者與君子所敬而
小人所不者與性不得則若禽獸性得之則甚雅似
者與匹夫隆之則爲聖人諸侯隆之則一四海者與
致明而約甚順而體請歸之禮

禮賦

皇天隆物以示下民或厚或薄帝不齊均桀紂以亂
湯武以賢浩浩淑淑皇皇穆穆周流四海曾不崇日
君子以脩跖以空室大參乎天精微而無形行義以

正事業以成可以禁暴足窮百姓待之而後寧秦臣
愚不識願問其名曰此夫安寬平而危險隘者邪修
潔之爲親而雜汙之爲狄者邪甚深藏而外勝敵者
邪法禹舜而不能揜迹者邪行爲動靜待之而後適
者邪血氣之精也志意之榮也百姓待之而後寧也
天下待之而後平也明達純粹而無疵也夫是之謂
君子之知

知賦

有物於此居則周靜致下動則綦高以鉅圓者中規
方者中矩大參天地德厚堯禹精微乎毫毛而充盈
乎大寓忽兮其極之遠也擗音兮其相逐而反也印

印兮天下之感寒也德厚而不損五采備而成文往
來憫憊通于大神出入甚極莫知其門天下失之則
滅得之則存弟子不敏此之願陳君子設辭請測意
之曰此夫大而不塞者與充盈太宇而不窺入郄宄
而不偏者與行遠疾速而不可託訛者與往來憫憊
而不可爲固塞者與暴至殺傷而不億忌者與功被
天下而不私置者與託地而游宇友風而子雨冬日
作寒夏日作暑廣大精神請歸之雲 雲賦

有物於此儻儻讀如其蟲兮其狀屢化如神功被天

下爲萬世文禮樂以成貴賤以分養老長幼待之爲

而後存名號不美與暴爲隣功立而身廢事成而家

敗弃其耆老收其後世人屬所利飛鳥所害臣愚而

不識請占之五泰五泰占之曰此夫身女好而頭馬

首者與屢化而不壽者與善壯而拙老者與有父母

而無牝牡者與冬伏而夏游食桑而吐絲前亂而後

治夏生而惡暑喜温而惡雨蛹以爲母蛾以爲父三

俯三起事乃大已夫是之謂蠶理 蠶賦

有物於此生於山阜處於室堂無知無巧善治衣裳

不盜不竊穿窬而行日夜合雜以成文章以能合從
又善連衡下覆百姓上飾帝王功業甚溥不見賢良

時用則存不用則亡臣愚不識敢請之王王曰此夫
始生鉅其成功小者邪長其尾而銚其剽者邪頭銛
達而剽趙掉繚者邪一往一來結尾以爲事無羽無
翼反覆甚極尾生而事起尾遭而事已簪以爲父管
以爲母旣以縫表又以連裏夫是之謂箴理 箴賦
天下不治請陳佹詩天地易位四時易鄉列星殞墜
日暮晦盲幽闇登昭日月下藏公正無私反見從橫
志愛公利重樓䟽堂無私罪人慙革貳兵道德純備
讒口將將仁人絀約教暴擅彊天下幽險恐失世英
螭龍爲蝦蚶鴟梟爲鳳皇比干見刳孔子拘匡昭昭
乎其知之明也郁郁乎其遇時之不詳也拂乎其欲
禮義之大行也闇乎天下之晦盲也皓天不復憂無
疆也千歲必反古之常也弟子勉學天不忘也聖人
共手時幾將矣與愚以疑願聞反辭其小歌也念彼
遠方何其塞矣仁人絀約暴人衍矣忠臣危殆讒人
服矣琰玉瑤珠弗知佩也雜布與錦弗知異也閭姬
子奢莫之媒也嫫母力父是之喜也以盲爲明以聾
爲聰以危爲安以吉爲凶嗚呼上天曷維其同

荀子第十八卷終

荀子第十九卷

大略篇第二十七

大略君人者隆禮尊賢而王重法愛民而霸好利多
詐而危欲近四旁莫如中央故王者必居天下之中
禮也天子外屏諸侯內屏禮也外屏不欲見外也內
屏不欲見內也諸侯召其臣臣不俟駕顛倒衣裳而
走禮也詩曰顛之倒之自公召之天子召諸侯諸侯
輦輿就馬禮也詩曰我出我車于彼牧矣自天子所
謂我來矣天子山冕諸侯玄冠大夫裨冕士韋弁禮
也天子御珽諸侯御荼占舒大夫服笏禮也天子彫

弓諸侯彤弓大夫黑弓禮也諸侯相見卿爲介以其
教出畢行使仁居守聘人以珪問士以璧召人以瑗
絕人以玦反絕以環人主仁心設焉知其役也禮其
盡也故王者先仁而後禮天施然也聘禮志曰幣厚
則傷德財侈則於禮禮云禮云玉帛云乎哉詩曰物
其指矣唯其偕矣不時宜不敬交不驩欣雖指非禮
也水行者表深使人無陷治民者表亂使人無失禮
者其表也先王以禮表天下之亂今廢禮者是去表
也故民迷惑而陷禍患此刑罰之所以繁也舜曰維
予從欲而治故禮之生爲賢人以下至庶民也非爲
成聖也然而亦所以成聖也不學不成堯學於君疇
舜學於務成昭禹學於西王國五十不成喪七十唯
衰存親迎之禮父南鄉而立子北面而跪醮而命之
往迎爾相成我宗事隆率以敬先妣之嗣若則有常
子曰諾惟恐不能敢忘命矣夫行也者行禮之謂也
禮也者貴者敬焉老者孝焉長者弟焉幼者慈焉賤
者惠焉賜予其宮室猶用慶賞於國家也忿怒其臣
妾猶用刑罰於萬民也君子之於子愛之而勿面使
之而勿貌導之以道而勿彊禮以順人心爲本故亡
於禮經而順人心者背禮者也禮之大凡事生飾驩

也送死飾哀也軍旅飾威也親親故故庸庸勞勞仁之殺也貴貴尊尊賢賢老老長長義之倫也行之得其節禮之序也仁愛也故親義理也故行禮節也故成仁有里義有門仁非其里而虛之非禮也義非其門而由之非義也推恩而不理不成仁遂理而不敢不成義審節而不知不成禮和而不發不成樂故曰仁義禮樂其致一也君子處仁以義然後仁也行義以禮然後義也制禮反本成末然後禮也三者皆通然後道也貨財曰賻輿馬曰賵衣服曰禭玩好曰贈玉貝曰含賻賵所以佐生也贈禭所以送死也送死不及柩尸弔生不及悲哀非禮也故吉行五十犇喪百里則贈及事禮之大也禮者政之輓也爲政不以禮政不行矣天子即位上卿進曰如之何憂之長也能除患則爲福不能除患則爲賊授天子一策中卿進曰配天而有下土者先事慮事先患慮患先事慮事謂之接接則事優成先患慮患謂之豫豫則禍不生事至而後慮者謂之後後則事不舉患至而後慮者謂之困困則禍不可禦授天子二策下卿進曰敬戒無怠慶者在堂弔者在閭禍與福鄰莫知其門豫哉豫哉萬民望之授天子三策禹見耕者耦立而式

過十室之邑必下殺大蚤朝大晚非禮也治民不以禮動斯陷矣平衡曰拜下衡曰稽首至地曰稽顙大夫之臣拜不稽首非尊家臣也所以辟君也一命齒於鄉再命齒於族三命族人雖七十不敢先上大夫中大夫下大夫吉事尚尊喪事尚親君臣不得不尊父子不得不親兄弟不得不順夫婦不得不驩少者以長者以養故天地生之聖人成之聘問也享獻也私覲私見也言語之美穆穆皇皇朝廷之美濟濟鎗鎗爲人臣下者有諫而無訕有亡而無疾有然而無怒君於大夫三問其疾三臨其喪於士一問一臨諸侯非問疾弔喪不之臣之家旣葬君若父之友食之則食矣不辟梁肉有酒醴則辭寢不踰廟設衣不踰祭服禮也易之咸見夫婦夫婦之道不可不正也君臣父子之本也咸感也以高下下以男下女柔上而剛下聘士之義親迎之道重始也禮者人之所履也失所履則顛蹙陷溺所失微而其爲亂大者禮也禮之於正國家也如權衡之於輕重也如繩墨之於曲直也故人無禮不生事無禮不成國家無禮不寧和樂之聲步中武象趨中韶護君子聽律習容而後士冰泮逆女霜降殺內十日一御坐視膝立視足應

對言語視面立視前六尺而大之六六三十六三丈
六尺文貌情用相爲内外表裏禮之中焉能累索謂
之能慮禮者本末相順終始相應禮者以財物爲用
以貴賤爲文以多少爲異下臣事君以貨中臣事君
以身上臣事君以人易曰復自道何其咎春秋賢穆
公以爲能變也士有妬友則賢交不親君有妬臣則
賢人不至蔽公者謂之昧隱良者謂之妬奉妬昧者
謂之交譎交譎之人妬昧之臣國之歲孽也口能言
之身能行之國寶也口不能言身能行之國器也口
能言之身不能行國用也口言善身行惡國妖也治
國者敬其寶愛其器任其用除其妖不富無以養民
情不教無以理民性故冢五畝宅百畝田務其業而
勿奪其時所以富之也立太學設庠序修六禮明十
教所以導之也詩曰飲之食之教之誨之王事具矣
武王始入殷表商容之間釋箕子之囚哭比干之墓
天下鄉善矣天下國有俊士世有賢人迷者不問路
溺者不問遂墜亡人好獨詩曰我言維服勿以爲笑先
民有言詢于芻蕘言博問也有法者以法行無法者
以類舉以其本知其末以其左知其右凡百事異理
而相守也慶賞刑罰通類而後應政教習俗相順而

後行八十者一子不事九十者舉家不事廢疾非人不養者一人不事父母之喪三年不事齊衰大功三月不事從諸侯來與新有昏者不事子謂子家駒續然大夫不如晏子晏子功用之臣也不如子產子產惠人也不如管仲管仲之爲人力功不力義力知不力仁野人也不可以爲天子大夫孟子三見宣王不言事門人曰曷爲三遇齊王而不言事孟子曰我先攻其邪心公行子之之燕遇曾元於塗曰燕君何如曾元曰志卑志卑者輕物輕物者不求助苟不求助何能舉氏羌之虜也不憂其係纍也而憂其不焚也

利夫秋豪害靡國家然且爲之幾爲知計哉今夫亡箴者終日求之而不得其得之非日益明也眸而見之也心之於慮亦然義與利者人之所兩有也雖堯舜不能去民之欲利然而能使其欲利不克其好義也雖桀紂亦不能去民之好義然而能使其好義不勝其欲利也故義勝利者爲治世利克義者爲亂世上重義則義克利上重利則利克義故天子不言多少諸侯不言利害大夫不言得喪士不通財貨有國之君不息牛羊錯質之臣不息雞豚豕卿不修幣大夫不爲場園從士以上皆羞利而不與民爭業樂分

施而恥積藏然故民不困財貧窶者有所竄其手文
王誅四武王誅二周公卒業至成康則案無誅已多
積財而羞無有重民任而誅不能此邪行之所以起
刑罰之所以多也上好羞則民間飾矣上好富則民
死利矣二者亂之衢也民語曰欲富乎忍恥矣傾絕
矣故舊矣與義分背矣上好富人民之行如此安得
不亂湯旱而禱曰政不節與使民疾與何以不雨至
斯極也宮室榮與婦謁盛與何以不雨至斯極也苞
苴行與讒夫興與何以不雨至斯極也天之生民非
爲君也天之立君以爲民也故古者列地建國非以
貴諸侯而已列官職差爵祿非以尊大夫而已主道
知人臣道知事故舜之治天下不以事詔而萬物咸
農精於田而不可以爲田師工賈亦然以賢易不肖
不待十而後知吉以治伐亂不待戰而後知克齊人
欲伐魯忌卞莊子不敢過卞晉人欲伐衛畏子路不
敢過蒲不知而問堯舜無有而求天府先王之道則
堯舜已六貳之博則天府已君子之學如蛇幡然遷
之故其行効其立効其坐効其置顏色出辭氣効無
留善無宿問善學者盡其理善行者究其難君子立
志如窮雖天子三公問正以是非對君子隘窮而不

失勞倦而不苟臨患難而不怠細席之言歲不寒無以知松柏事不難無以知君子無日不在是雨小漢故潛夫盡小者大積微者著德至者色澤洽行盡而聲問遠小人不誠於內而求之於外言而不稱師謂之畔教而不稱師謂之倍倍畔之人明君不內朝士大夫遇諸塗不與言不足於行者說過不足於信者誠言故春秋善胥命而詩非屢盟其心一也善爲詩者不說善爲易者不占善爲禮者不相其心同也會子曰孝子言爲可聞行爲可見言爲可聞所以說遠也行爲可見所以說近也近者說則親遠者說則附

親近而附遠孝子之道也會子行晏子從於郊曰嬰聞之君子贈人以言庶人贈人以財嬰貧無財請假於君子贈吾子以言乘輿之輪大山之木也示真諸隱栝三月五月爲櫛葉敝而不及其常君子之隱栝不可不謹也慎之蘭茝臺本漸於蜜醴一佩易之正君漸於香酒可讒而得也君子之所漸不可不慎也人之於文學也猶玉之於琢磨也詩曰如切如磋如琢如磨謂學問也和之璧井里之厥也玉人琢之爲天子寶子贛季路故鄙人也被文學服禮義爲天下列士學問不厭好士不倦是天府也君子疑則不言

未問則不立道遠日益矣多知而無親博學而無方
好多而無定者君子不與少不諷壯不論議雖可未
成也君子一教弟子一學亟成君子進則能益上之
譽而損下之憂不能而居之誣也無益而厚受之竊
也學者非必為仕而仕者必如學子貢問於孔子曰
賜倦於學矣願息事君孔子曰詩云溫恭朝夕執事
有恪事君難事君焉可息哉然則賜願息事親孔子
曰詩云孝子不匱求錫爾類事親難事親焉可息哉
然則賜願息於妻子孔子曰詩云刑于寡妻至於兄
弟以御于家邦妻子難妻子焉可息哉然則賜願息
於朋友孔子曰詩云朋友攸攝攝以威儀朋友難朋
友焉可息哉然則賜願息耕孔子曰詩云書爾于茅
宵爾索綯取其乘屋其始播百穀耕難耕焉可息哉
然則賜無息者乎孔子曰望其墻宰如也嶼如也鬲
如也此則知所息矣子貢曰大哉死乎君子息焉小
人休焉國風之好色也傳曰盈其欲而不愆其止其
誠可比於金石其聲可內於宗廟小雅不以於汙上
自引而居下疾今之政以思往者其言有文焉其聲
有哀焉國將興必貴師而重傅貴師而重傅則法度
存國將衰必賤師而輕傅賤師而輕傅則人有快人

有快則法度壞古者匹夫五十而士天子諸侯子十九而冠冠而聽治其教至也君子也者而好之其人其人也而不教不祥非君子而好之非其人也非其人而教之齋盜置借賊兵也不自嫌其行者言濫過古之賢人賤爲布衣貧爲匹夫食則饘粥不足衣則豎褐不完然而非禮不進非義不受安取此子夏貧衣若縣鶉人曰子何不仕曰諸侯之驕我者吾不爲臣大夫之驕我者吾不復見柳下惠與後門者同衣而不見疑非一日之聞也爭利如蚤爪甲而喪其掌君人者不可以不慎取臣匹夫者不可以不慎取友友者所以相有也道不同何以相友也均薪施火火就燥平地注水水流溼夫類之相從也如此之著也以友觀人焉所疑取友善人不可不慎是德之基也詩曰無將大車維塵冥冥言無與小人處也藍苴路作似知而非懦弱易奪似仁而非悍戆好鬪似勇而非仁義禮善之於人也辟之若貨財粟米之於家也多有之者富少有之者貧至無有者窮故大者不能小者不爲是弃國捐身之道也凡物有乘而來乘其出者是其反者已流言滅之貨色遠之禍之所由生自纖纖也是故君子蚤絕之言之信者在乎區蓋之

間疑則不言未問則不立知者明於事達於數不可
以不誠事也故曰君子難說說之不以道不說也語
曰流丸止於甌臯流言止於智者此家言邪學之所
以惡儒者也是非疑則度之以遠事驗之以近物參
之以平心流言止焉惡言死焉曾子食魚有餘曰泔
之門人曰泔之傷人不若奧之曾子泣涕曰有異心
乎哉傷其聞之晚也無用吾之所短遇人之所長故
塞而避所短移而從所仕疏知而不法察辯而操僻
勇果而妄君子之所憎惡也多言而類聖人也少言
而法君子也多少言無法而流涵然雖辯小人也國

法禁拾遺惡民之串無以分得也有分義則容天下
而治無分義則一妻一妾而亂天下之人雖各特意
哉然而有所共予也言味者予易牙言音者予師曠
言治者予三王三王既已定法度制禮樂而傳之有
不用而改自作何以異於變易牙之和更師曠之律
無三王之治天下不待亡國不待死飲而不食者蟬
也不飲不食者蜉蝣也虞舜孝已而親不愛比干子
胥忠而君不用仲尼顏淵知而窮於世劫迫於暴國
而無所辟之則崇其善揚其美言其所長而不稱其
所短唯唯而亡者誹也博而窮者訾也清之而俞濁

者口也君子能爲可貴不能使人必好已能爲可用不能使人必用已誥誓不及五帝盟詛不及三王交質子不及五伯

荀子第十九卷終

荀子第二十卷

宥坐篇第二十八

孔子觀於魯桓公之廟有欹器焉孔子問於守廟者曰此爲何器守廟者曰此蓋宥坐之器孔子曰吾聞宥坐之器者虛則欹中則正滿則覆孔子顧謂弟子曰注水焉弟子挹水而注之中而正滿而覆虛而欹孔子喟然嘆曰吁惡有滿而不覆者哉子路曰敢問持滿有道乎孔子曰聰明聖知守之以愚功被天下守之以讓勇力撫世守之以怯富有四海守之以謙此所謂挹而損之道也孔子爲魯相攝朝七日而

誅少正卯門人進問曰夫少正卯魯之聞人也夫子
爲政而始誅之得無失乎孔子曰居吾語汝其故人
有惡者五而盜竊不與焉一曰心達而險二曰行辟
而堅三曰僞言而辯四曰記醜而博五曰順非而澤
此五者有一於人則不得免於君子之誅而少正卯
兼有之故居處足以聚徒成羣言談足以飾邪營衆
彊足以反是獨立此小人之桀雄也不可誅也是
以湯誅尹諧文王誅潘正周公誅管叔太公誅華仕
管仲誅付里乙子產誅鄧析史付此七子者皆異世
同心不可不誅也詩曰憂心悄悄愠于群小小人成
群斯足憂矣孔子爲魯司寇有父子訟者孔子拘之
三月不別其父請止孔子舍之季孫聞之不悅曰是
老也欺予語予曰爲國家必以孝今殺一人以戮不
孝又舍之冉子以告孔子慨然歎曰嗚呼上失之下
殺之其可乎不教其民而聽其獄殺不辜也三軍大
敗不可斬也獄犴不治不可刑也罪不在民故也嫚
令謹誅賊也今有時斂也無時暴也不教而責成功
虐也已此三者然後刑可即也書曰義刑義殺勿庸
以即予維曰未有順事言先教也故先王旣陳之以
道上先服之若不可尚賢以綦之若不可廢不能以

單之綦三年而百姓往矣邪民不從然後俟之以刑則民知罪矣詩曰尹氏大師維周之氏秉國之均四方是維天子是毗俾民不迷是以威厲而不試刑錯而不用此之謂也今之世則不然亂其教繁其刑其民迷惑而陷焉則從而制之是以刑彌繁而邪不勝三尺之岸而虛車不能登也百仞之山任負車登焉何則陵遲故也數仞之牆而民不踰也百仞之山而豎子馮而游焉陵遲故也今夫世之陵遲亦久矣而能使民勿踰乎詩曰周道如砥其直如矢君子所履小人所視眷焉顧之替然出涕豈不哀哉詩曰瞻彼

日月悠悠我思道之云遠曷云能來子曰伊稽首不其有來乎孔子觀於東流之水子貢問於孔子曰君子之所以見大水必觀焉者何也孔子曰夫水大徧與諸生而無爲也似德其流也埤下裾方拘曲必循其理似義其泐泐乎不涸盡似道若有決行之其應佚若聲響其赴千仞之谷不懼似勇主量必平似法盈不求概似正淖約微達似察以出以入就鮮絜似善化其萬折也必東似志是故君子見大水必觀焉孔子曰吾有恥也吾有殆也幼不能彊學老無以教之吾恥之去其故鄉事君而達卒遇故人曾無舊言

吾鄙之與小人處者吾殆之孔子曰如埴而進吾與之如丘而止吾已矣今學曾未如肱贅則具然欲爲人師孔子南適楚厄於陳蔡之間七日不火食藜藿不糗弟子皆有饑色子路進問之曰由聞之爲善者天報之以福爲不善者天報之以禍今夫子累德積義懷美行之日久矣奚居之隱也孔子曰由不識吾語汝汝以知者爲必用邪王子比干不見剖心乎汝以忠者爲必用邪關龍逢不見刑乎汝以爲諫者爲必用邪伍子胥不磔姑蘇東門外乎夫遇不遇時也賢不肖材也君子博學深謀不遇時者多矣由是觀之不遇世者衆矣何獨立哉夫芷蘭生於深林非以無人而不芳君子之學非爲通也爲窮而不困憂而意不衰也知禍福終始而心不惑也夫賢不肖者材也爲不爲者人也遇不遇者時也死生者命也今有其人不遇其時雖賢其能行乎苟遇其時何難之有故君子博學深謀修身端行以俟其時孔子曰由居吾語汝晉公子重耳霸心生於曹越王勾踐霸心生於會稽齊桓公小白霸心生於莒故居不隱者思不遠身不佚者志不廣女庸安知吾不得之桑落之下子貢觀於魯廟之北堂出而問於孔子曰鄉者賜觀

於太廟之比堂未既輟還復瞻比蓋彼皆繼邪彼有說邪匠過絕邪孔子曰太廟之堂亦未嘗有說官致良工因麗節文非無良材也蓋曰貴文也

子道篇第二十九

入孝出弟人之小行也上順下篤人之中行也從道不從君從義不從父人之大行也若夫志以禮安言以類接則儒道畢矣雖舜不能加毫末於是矣孝子所以不從命有三從命則親危不從命則親安孝子不從命乃衷從命則親辱不從命則親榮孝子不從命乃義從命則禽獸不從命則修飾孝子不從命乃

敬故可以從而不從是不子也未可以從而從是不衷也明於從不從之義而能致恭敬忠信端慤以慎行之則可謂大孝矣傳曰從道不從君從義不從父此之謂也故勞苦彫萃而能無失其敬災禍患難而能無失其義則不幸不順見惡而能無失其愛非仁人莫能行詩曰孝子不匱此之謂也魯哀公問於孔子曰子從父命孝乎臣從君命貞乎三問孔子不對孔子趨出以語子貢曰鄉者君問丘曰子從父命孝乎臣從君命貞乎三問而丘不對賜以爲何如子貢曰子從父命孝矣臣從君命貞矣夫子有奚對焉孔

子曰小人哉賜不識也昔萬乘之國有爭臣四人則封疆不削千乘之國有爭臣三人則社稷不危百乘之國有爭臣二人則宗廟不輟父有爭子不行無禮士有爭友不爲不義故子從父奚子孝臣從君奚臣貞審其所以從之之謂孝之謂貞也子路問於孔子曰有人於此夙興夜寐耕耘樹藝手足胼胝以養其親然而無孝之名何也孔子曰意者身不敬與辭不遜與色不順與古之人有言曰衣與繆與不女聊今夙興夜寐耕耘樹藝手足胼胝以養其親無此三者則何以爲而無孝之名也孔子曰由志之吾語汝雖有國士之力不能自舉其身非無力也勢不可也故入而行不脩身之罪也出而名不章友之過也故君子入則篤行出則友賢何爲而無孝之名也子路問於孔子曰魯大夫練而牀禮邪孔子曰吾不知也子路出謂子貢曰吾以夫子爲無所不知夫子徒有所不知子貢曰汝何問哉子路曰由問魯大夫練而牀禮邪夫子曰吾不知也子貢曰吾將爲汝問之子貢問曰練而牀禮邪孔子曰非禮也子貢出謂子路曰汝謂夫子爲有所不知乎夫子徒無所不知汝問非也禮居是邑不非其大夫子路盛服見孔子孔子曰

由是裾裾何也昔者江出於岷山其始出也其源可
以濫觴及其至江之津也不放舟不避風則不可涉
也非維下流水多邪今汝服旣盛顏色充盈天下且
孰肯諫汝矣由子路趨而出改服而入蓋猶若也孔
子曰志之吾語汝奮於言者華奮於行者伐色知而
有能者小人也故君子知之曰知之不知曰不知言
之要也能之曰能之不能曰不能行之至也言要則
知行至則仁旣知且仁夫惡有不足矣哉子路入子
曰由知者若何仁者若何子路對曰知者使人知已
仁者使人愛已子曰可謂士矣子貢入子曰賜知者
若何仁者若何子貢對曰知者知人仁者愛人子曰
可謂士君子矣顏淵入子曰回知者若何仁者若何
顏淵對曰知者自知仁者自愛子曰可謂明君子矣
子路問於孔子曰君子亦有憂乎孔子曰君子其未
得也則樂其意旣已得之又樂其治是以有終身之
樂無一日之憂小人者其未得也則憂不得旣已得
之又恐失之是以有終身之憂無一日之樂也

法行篇第三十

公輸不能加於繩聖人莫能加於禮禮者衆人法而
不知聖人法而知之曾子曰無內人之疏無外人之

親也無身不善而怨人無刑已至而呼天內人之疏
而外人之親不亦遠乎身不善而怨人不亦反乎刑
已至而呼天不亦晚乎詩曰涓涓源水不雍不塞穀
旣破碎乃大其輻事以敗矣乃重大息其亡益乎曾
子病曾元持足曾子曰元志之吾語汝夫魚鼈鼃鼃
猶以淵為淺而堀其中鷹鳶猶以山為卑而巢其上
及其得也必以餌故君子苟能無以利害義則恥辱
亦無由至矣子貢問於孔子曰君子之所以貴玉而
賤珉者何也為大王之少而珉之多邪孔子曰惡賜
是何言也夫君子豈多而賤之少而貴之哉夫王者

君子比德焉溫潤而澤仁也縝栗而理知也堅剛而
不屈義也廉而不剡行也折而不撓勇也瑕適並見
情也扣之其聲清越而遠聞其止輟然辭也故雖有
珉之彫彫不若王之章章詩云言念君子溫其如玉
此之謂也會子曰同遊而不見愛者吾必不仁也交
而不見敬者吾必不長也臨財而不見信者吾必不
信也三者在身曷怨人怨人者窮怨天者無識失諸
已而反諸人豈不亦迂哉南郭惠子問於子貢曰夫
子之門何其雜也子貢曰君子正身以俟欲來者不
距欲去者不止且夫良醫之門多病人隱括之側多

枉木是以雜也君子有三恕有君不能事有臣而求其使非恕也有親不能報有子而求其孝非恕也有兄不能敬有弟而求其聽令非恕也士明於此三恕則可以端身矣孔子曰君子有三思而不可不思也少而不學長無能也老而不教死無思也有而不施窮無與也是故君子少思長則學老思死則教有思窮則施

哀公篇第三十一

魯哀公問於孔子曰吾欲論吾國之士與之治國敢問何如之邪孔子對曰生今之世志古之道居今之俗服古之服舍此而為非者不亦鮮乎哀公曰然則夫章甫絢履紳而搢笏者此賢乎孔子對曰不必然夫端衣玄裳纒而乘路者志不在於食葷斬衰營履杖而啜粥者志不在於酒肉生今之世志古之道居今之俗服古之服舍此而為非者雖有不亦鮮乎哀公曰善孔子曰人有五儀有庸人有士有君子有賢人有大聖哀公曰敢問何如斯可謂庸人矣孔子對曰所謂庸人者口不能道善言心不知色色不知選賢人善士託其身焉以為已憂勤行不知所務止交不知所定日選擇於物不知所貴從物如流不知所

歸五鑿為正心從而壞如此則可謂庸人矣哀公曰
善敢問何如斯可謂士矣孔子對曰所謂士者雖不
能盡道術必有率也雖不能徧美善必有處也是故
知不務多務審其所知言不務多務審其所謂行不
務多務審其所由故知既已知之矣言既已謂之矣
行既已由之矣則若性命肌膚之不可易也故富貴
不足以益也卑賤不足以損也如此則可謂士矣哀
公曰善敢問何如斯可謂君子矣孔子對曰所謂君
子者言忠信而心不德仁義在身而色不伐思慮明
通而辭不爭故猶然如將可及者君子也哀公曰善
敢問何如斯可謂賢人矣孔子對曰所謂賢人者行
中規繩而不傷於本言足法於天下而不傷於身富
有天下而無怨財布施天下而不病貧如此則可謂
賢人矣哀公曰善敢問何如斯可謂大聖矣孔子對
曰所謂大聖者知通乎大道應變而不窮辨乎萬物
之情性者也大道者所以變化遂成萬物也情性者
所以理然不取舍也是故其事大辨乎天地明察乎
日月總要萬物於風雨繆繆肫肫其事不可循若天
之嗣其事不可識百姓淺然不識其鄰如此則可謂
大聖矣哀公曰善魯哀公問舜冠於孔子孔子不對

三問不對哀公曰寡人問舜冠於子何以不言也孔子對曰古之王者有務而拘領者也其政好生而惡殺焉是以鳳在列樹麟在郊野烏鵲之巢可俯而窺也君不此問而問舜冠所以不對也魯哀公問於孔子曰寡人生於深宮之中長於婦人之手未嘗知哀也未嘗知憂也未嘗知勞也未嘗知懼也未嘗知危也孔子曰君之所問聖君之問也丘小人也何足以知之曰非吾子無所聞之也孔子曰君入廟門而右登自阼階仰視榱棟俛見几筵其器存其人亡君以此思哀則哀將焉而不至矣君昧爽而櫛冠平明而聽朝一物不應亂之端也君以此思憂則憂將焉而不至矣君平旦而聽朝日昃而退諸侯之子孫必有在君之末庭者君以此思勞則勞將焉而不至矣君出魯之四門以望魯四郊亡國之虛必有數蓋焉君以此思懼則懼將焉而不至矣且丘聞之君者身也庶人者小也水則載舟水則覆舟君以此思危則危將焉而不至矣魯哀公問於孔子曰紳委章甫有益於仁乎孔子蹴然曰君號然也齊衰苴杖者不聽樂非耳不能聞也服使然也黼衣黻裳者不如葦非口不能味也服使然也且丘聞之好肆不守折長者不

爲市竊其有益與其無益君子所以知魯哀公問於孔子曰請問取人孔子對曰無取健無取誄無取口啍健貪也誄亂也口啍誕也故弓調而後求勁焉馬服而後求良焉士信慤而後求知能焉士不信慤而有多知能譬之其豺狼也不可以身介也語曰桓公用其賊又公用其盜故明主任計不信怒闇主任怒不任計計勝怒者彊怒勝計者亡定公問於顏淵曰東野子之善馭乎顏淵對曰善則善矣雖然其馬將失定公不悅入謂左右曰君子固讒人乎三日而校來謁之曰東野畢之馮失兩驂列兩服入既定公越席而起曰趨駕召顏淵顏淵至定公曰前日寡人問吾子吾子曰東野異之馭善則善矣雖然則馬將失不識吾子何以知之顏淵對曰臣以政知之昔舜巧於使民而造父巧於使馬舜不窮其民造父不窮其馬是舜無失民造父無失馬也今東野畢之馭上車執轡銜也正矣步驟馳騁朝禮畢矣歷險致遠馬力盡矣然猶求馬不已是以知之也定公曰善可得少進乎顏淵對曰臣聞之鳥窮則啄獸窮則攫人窮則詐自古及今未有窮其下而能無危者也

堯問篇第三十二

堯問於舜曰我欲致天下爲之奈何對曰執一無失
行微無怠忠信無倦而天下自來執一如天地行微
如日月忠誠盛於內賁於外形於四海天下其在一
隅邪夫有何足致也魏武侯謀事而當羣臣莫能逮
退朝而有喜色吳起進曰亦常有以楚莊王之語聞
於左右者乎武侯曰楚莊王之語何如吳起對曰楚
莊王謀事而當羣臣莫能逮退朝而有憂色申公巫臣
進問曰王朝而有憂色何也莊王曰不穀謀事而當
羣臣莫能逮是以憂也其在中歸仲之言也曰諸侯自
爲得師者王得友者霸得疑者存自爲謀而莫已若

者亡今以不穀之不肖而羣臣莫吾逮吾國幾於亡
乎是以憂也楚壯王以憂而君以喜武侯逡巡再拜
曰天使夫子振寡人之過也伯禽將歸於魯周公謂
伯禽之傅曰汝將行盍志而子美德乎對曰其爲人
寬好自用以慎此三者其美德也已周公曰嗚呼以
人惡爲美德乎君子好以道德故其民歸道彼其寬
也出無辨矣汝又美之彼其好自用也是所以窶小
也君子力如牛不與牛爭力走如馬不與馬爭走知
如士不與士爭知彼爭者均者之氣也汝又美之彼
其慎也是其所以淺也聞之曰無越踰不見士見士

問曰無乃不察乎不聞即物少至少至則淺彼淺者
賤人之道也汝又美之吾語汝我文王之爲子武王
之爲弟成王之爲叔父吾於天下不賤矣然而吾所
執贄而見者十人還贄而相見者三十人貌執之士
者百有餘人欲言而請畢事者千有餘人於是吾僅
得三士焉以正吾身以定天下吾所以得三士者亡
於十人與三十人中乃在百人與千人之中故上士
吾薄爲之貌下士吾厚爲之貌人皆以我爲越踰好
士然故士至士至而後見物見物然後知其是非之
所在戒之哉汝其以晉國驕人幾矣夫仰祿之士猶

可驕也正身之士不可驕也彼正身之士全貴而爲
賤舍貴而爲公舍侯而爲勞顏色黎黑而不失其所
是以天下之紀不息文章不廢也語曰繒丘之封人
見楚相孫叔敖曰吾聞之也處官久者士妬之祿厚
者民怨之位尊者君恨之今相國有此三者而不得
罪楚之民何也孫叔敖曰吾三相楚而心愈卑每
益祿而施愈博位滋尊而禮愈恭是以不得罪於楚
之士民也子貢問於孔子曰賜爲人下而未知也孔
子曰爲人下者其猶土也深拍之而得甘泉焉樹之
而五穀蕃焉草木殖焉禽獸育焉生則立焉死則入

荀子卷三
一四
焉多其功而不息爲人下者其無土也昔虞不用宮
之奇而晉并之萊不用子馬而齊并之紂劓王子比
干而武王得之不親賢用知故身死國亡也

荀子第二十卷終

